



SORAS DOMINICANAS DA GLION

Midadas en il Cussegl general

Muort la pandemia da corona han las soras dominicanas da Glion stuiu referer il Capetel general dad uonn sin igl atun 2022. Duront quel dat ei elecziuns. Duas cusseglieras generalas: sora *Armina Maisen* e sora *Maria Esther Küttel* ein sedecididas – suenter madira ponderaziun – da seretretar gia quest atun. Ellas han apparteni sis onns al Cussegl general. Quel ha clamau da niev el Cussegl general sora *Eugenia Jörger*, sco secretaria generala, e sora *Maria José de Sousa Brito*, Brasilia. Allas soras partentas vegn engraziu per lur engaschi e las novas commembras beneventadas el Cussegl general.

Cussegl intern – november 2021

Sut in capetel claustral capeschan las soras da Glion reuniuns regularas enteifer la cuminonza. Silla gliesta da tractandas ein stadas damondas dil mintgadi, la planisaziun da pass necessaris pil futur e bia auter. El center eran uonn plitost damondas davart igl avegnir en vesta alla cuminonza claustrala che vegn adina pli attempada, plinavon oraziun e liturgia sco era l'organisaziun el mintgadi dalla Claustra. Quei scriva sora *Annemarie Müller*, priura generala dallas soras dominicanas da Glion, en ina communicaziun e schizun per romontsch.

Motto per 2022: «Cultura da pasch ella cuminonza»

Igl onn 2021 s'enclina. Uonn ein las soras da Glion sereguardadas specialmein dil fundatur, sogn Dumeni, morts avon 800

onns e quei sut il motto: «A meisa cun sogn Dumeni».

Per 2022 secloma la tesa: «Cultura da pasch ella cuminonza». Inspiradas leutier ein las dominicanas vegnidadas tras «Forum per cultura da pasch», vegnius creaus per «Ilanzer Sommer», che ha giu liug igl uost vargau per l'emprema gada ella Casa da sentupada ella Claustra a Glion e staus in success cumplein. Quei Forum ha sco finamira dad organisar mintg'onn l'occurrenza «Ilanzer Sommer» sco project che stat dil tuttafatg ell'enzenna dalla pasch. 2022 ha quel liug dils 7 – 13 d'uost.

Pandemia – «Pursepen da Nadal» – nova fassada

Il november ha la pandemia contonschiu la Claustra da Glion. Quella ha impediud fetg il process da mintgadi pervia dallas mesiras zun severas, stadas necessarias. Grazia alla virola ein ils simptoms stai mi-geivels tier las biaras soras.

«Il pursepen da Nadal» – in'ovra dalla consora defuncta Anita Derungs – ei pusppei exponius ella baselgia claustrala – suenter in onn d'interrupziun. Muort corona ein visetas spontanias senza annunzia buca pussevlas.

Las soras da Glion ein fetg satisfatgas dalla renovaziun reussida dalla fatschada dalla baselgia claustrala 50 onns suenter sia consecraziun. Ins ei engrazieivels pigl agid retschiert. Legreivel ei ch'igl entir complex claustral s'auda denter ils 52 meglers baghetgs el cantun Grischun da 1950 – 2020. (fmr/gc)